

FRIISK TISING

Lasmootebles foon e Friisk Foriining – 2/2017

telefoon: 04671-6024154, iimail: info@friiske.de

Luked jarst teoterstuk foon "Et nordfriisk teoter"

Mat jarst teoterstuk "Da üülje da goue" foon e naie teoterferiin „Et nordfriisk teoter“ as iinjsen wider wised wörden, wat åles möölik aw frasch. "Et nordfriisk teoter" wal derfoor möre profäsjonåle frasche stöogne önjt iir aptufåäre, weer et jarst stuk "da üülje da goue" nü e önjfång måaget heet. Wichti as et en schåaw mat teoter for enarken en tugung tu e frasche språke. Arks stuk, wat apfjart wård, as ma tjúsche ouertiitel fersånj, sü dåt enarken wat frasch ai ferstönje koon, likes åles ma fåit. Et süstem kóm gödj önj, sää di kunstnerische liidjer Gary Funck. Sügoor bääsegåaste üt Söödtjüschlönj än manschne wat lait unti ninte hiire koone, hääwe en lacht en füli e hoonling. Et näist stuk „Jonk Bradlep“, en teel foon Ellin Nickelsen, schal önj e stormmoune (oktoober) apfjart wårde. Enarken, wat et projåkt stipe wal, koon lasmoot bai „Et Nordfriisk Teoter“ wårde. For lasmootee jeeft et for arks premiere iinj koord amsunst. Möör tu waasen foue jam uner www.teoter.de



Jöögdspråkeråis eefter Ladiinjen – nuch frie plåatse

Foon e 24. – 31. juuli kjart e Friisk Foriining eefter Ladiinjen önj e Dolomiite. Schandlikerwis hääwe jam nuch ai nooge jöögdelike önjmalded. Deeram koone da plåatse wat nuch ouer san uk foon wåksne beseet wårde.

E smuk bårjeloonschap foon e Dolomiite as sunt 2009 üttiiknet as UNESCO-wråålsnatuur-årwpårt, än et jeeft maning

möölikhåide for ünlike forheewene, sü as kååbelboon kåären, segway-tuure unti spånke.

Ouers uk kulturål heet Ladiinjen ordi wat tu biidjen. Üülje borje än sloote lååsie dertu in beseecht tu wården.

Ladinisch as en romanischen språke, wat nuch foon amenbai 30.000 manschne snååked wårt. Ouers da Ladiinere unerschiise jam ai bloots döör e åine språke, ouers uk döör e ouer iirhunerte wüksene, åin kultur, wat sin rötje önj e bårjeloonschap än önjt kunsthoonwårk heet.

Moundi, di 24. juuli, kåäre we me en bus lüüs. For unerwåis as en twascheouernåchting önj Söödtjüschlönj inploond, sü dåt we en lait tid hääwe am üs tu ferhåålen. Di näiste dái gungt et dan widere, sü dåt we di täisdi bai üüs kwartiir, en meeklik latj koot boowen önj e bårje, önjkaame.

E diiljnaamerpris lait bai: **250 € awt hood** (inklusiive råis, höör än fåis).

EUROPEADA 2020

Di 20.5 wörd önj Rumånien aw e FUEV-kongrås deerouer oufstimd weer e Europeada 2020 oufhüüljen wårde schal. Bewürwen håi e Friisk Foriining ha tuhuupe ma da oudere trii manerhåide önjt grånslönj ma et moto: „E Europeada 2020 twasche Weest- än Ååstsiie, et grånsouertreesen fõtjbålfåst“. Schandlikerwis hääwe we ai nooch reese fúnj kööt, deeram as e näist Europeada bai da Kårtner Slowene.



Iirsberucht 2016/2017 (korted)

. . . forläid aw e lasmootefersoomling foon e Foriining, di 16. märts 2017 önj Risem.

- Üusen ålereklub häi e 12. moi tu en **uursütfluch** eefter Bräist lääsid. Tujarst gäng et tut Nordfriisk Instituut, weer e nai ütstaling tu e frasche språke önjt Nordfriisk Futuur wised wörd. Eeftert jäif et kafe än kääge önjt Café Frida.

- Foon e 3. bit 5. juuni wjarn en diilj lasmoote foon e Foriining ma tut interfriisk drääwen aw Håililönj, organisiird foon e Frasche Rädj.

- Bai e **treed fõtjbål-euroopamäisterschap** for manerhäide (Europeada) önj Söödtirool foon 18. bit 26. juuni heet e Friisk Foriining ma en moonschaft üt Nordfraschlönj diiljnümen. Eefter e forrunde wjarn ja kiiwenooch rüt üt et turniir. Iin spal häins wüenen, bai iin spal stöö et lik, än iin spal hääwes ferlääsen.



- Üüse lasmooteferiin Rökefloose wus foon e 16. bit 17. juuli wider sin aktionwaagiinje for frasche jöögedlike önjbin. Di jarste däi ging et eefter Sankt-Peter am tu Surfen, än di tweede däi wjarn ja önj Buleryp-Bov am Lasertag tu spaalen.

- E Friisk Foriining wus foon e 11. bit 18. august aw en **frasch språkeräis** aw et kanoolailönj Jersey, weer et nuch am en bai 1000 spregere foon e normanische dialäkt Jërriais jeeft. E diiljnaamertål wus foon began aw 20 fäästläid, än da plåtse wjarn gau ütböked. Et wörd en trinam loked forheewen ma maning naie informatsjoone am et manerhäidelaawen aw Jersey.



- Önj e önjfång foont nai schöljiir köön inträsiirde wi **naie fraschkurse** önj Risem Schölj beleede. Än for önjfångere ma Thora Kahl än än for widerekiimene ma Ute Jessen.

- Di **samerütfluch** gäng e. 10. septämber ma en bus, än en ra priwootwoine eefter dānsch. Tu jarst wjarn we önj Hadersleben, ma en fääring döör e doomschörk, än dan gäng et eefter Christiansfeld, for kafe än kääge, än weer Marie Tångeberg wat am e stää ferteeld.

- Üüse lasmooteferiin Frisia Historica heet dāt waagiinje foon e 17. bit 18. septämber sin **tiiniiri bestönjen** önj Hünebel fiirt. Ma önjt program wus boogenschiitjen, swjardstrid, iiljshow, än maning konsärte foon ünlike floose.



- Üüse **geschäftsfaärer Manfred Nissen** as eefter 34 iir önj ränte gängen. Di 30.09 wjarn waane än koleege önjt Friisk hüs, am adjiis tu Manfred tu seeden. Awfoorie häi hi nuch e möölikhäid san eefterfülier Ilwe Boysen in tu årben.

- Bait 29. **Friisk Harfsthuuchschölj** awt dānsch följkhuuchschölj önj Jarplund wjarn mör as 50 diiljnaamere foon e 30. septämber bit tu e 3. oktober. Önjt program wjarn maning ünlike workshops, weer t.b. ma hoolt, papiir, unti parlekääde årbet wörd. Önjbin wörd uk doons, karbaret, frasch for önjfångere än en ütfluch önj eefter Hüsem tu en Rungholt ütstaling. Di een wörd e film foont wunterfäst teooter wised.

- E 12. oktober wjarn da ålere lasmoote tu en meekliken eeftermadi inlääsid. Tujarst gäng et eefter Foortuft, weer da wüste en päpeütstaling, än da kjarls et museum önjt schöljgebüude beseechten. Eeftert jäif et dan kafe önj e Horne.

- Tuhuupe ma Nord- än Söödsaswikere hääwe we dāt teooterprojäkt "**Adding Sights**" döorfjard. Deerbai hääwe jam frasche, dānsche än tjüsche manerhäide-teooterspaalere foon e 15. – 23. oktober önj Leek inkwärtiirt. En arken floose heet

en teoterstuk inöowed wat bait iinje foon e waag önj Leek, än e 2. nowämber önj Hadersleben foor än briidj publikum apfjard wörden as. Et projäkt wörd stiped ma Kurskultuur–neetwätkmadle.

- Önj Strükem bai e B5 jeeft et nü sunt iinje oktoober hu **wäiwisere bai e stroote uk aw frisch**. Bit iinje 2017 schan äle wäiwiser-schilde önj Nordfraschlönj twäärspräklik weese.

- Foon e 23. bit 26. nowämber heet e Friisk Foriining fort süst tooch et **"European Minority Film Festival"** önj Hüsem ütruchtet. Dâtheer tooch köö et festival sin 10 iirs bestönjen fiire. Et wörden spalfilme aw waliisch, baskisch, weestfräsch, än catalaanisch wised. Di saneene slüütj et festival ma en grut filmgaala önj Husumhus ouf.

- Üusen älere-klub häi e 8. detsämber lååsid tu en fiirliken **adwänts-eeftermadi** önjt Galerie Café önj Lunham. As geeste köö Luise Clasen Thora Kahl än schoulere fount frisch dânsch schölj üt Risem begröote. Ja unerhüüljen ma dachte än jülsunge.

- Di 23. detsämber heet e Foriining ma en ra junge fräsche wi en sü nåmd **müüstische stäägne jültuur** döorfjard. Jarling gäng et eefter Flansboi.

- Tut **buume soomeln foor e Biike** drääweden ham e 14.01 ferträäser foon da fräsche feriine. Deereefter jäif et dan nuch puns än stjüte ine bai Thore.



- Tut **wunterfäst** ma gräinküüljääsen önj Risem di 3. februar kömen 95 lasmoote än waane foon e Foriining. Eeftert gräinküülj jäif et live-musiik ma e Mahara as musical-schungster, än Constance bait klawiir. Dan heet Karin Haug for spoos än unerhüüljing for enarken sörid ma "Huum koon dât dan waase?"

- Di 20 februar häi e Friisk Foriining än **drääwen ma e dânsche schöljferiin**, am am e tukamst foon e fräschunerrucht aw

dânsche schoule tu snååken. Er wörd beslin dât we üs tou tooche önjt iir drääwe, weerbai da schöljmäister foon äle schoule önj Nordfraschlönj bai än foon da drääwen deerbai weese schan.

- Tut **buume soomeln foor e Biike** drääweden ham e 14.01 ferträäser foon da fräsche feriine. Deereefter jäif et dan nuch puns än stjüte ine bai Thore.

- Tut **biikebrånen** – jarling aw en saandi – häin da fräsche feriine önjt toorp tujarst tut iilj eefter Lunham än awäädrie tut fäst eefter Risem önjt "Fraschlönj" lååsid. E blikereede wörd hülen foon Florian Lorenzen. Eeftert teoter ma "E wäär wjard amt täälelönj" foon e Rökefloose jäif et dan diskomusiik ma Dirk Bork.



Wat kamt aw üs tu?

- **Rökefloose Aktionwaagiinje**

(8.-9. Juuli)

- **6. Friesisch-Historisches Treyben** önj Naibel (21.-23. juuli)

- **Jöögedspräkeräis eefter Ladiinjen** (24. – 31. juuli).

- **Samerütfluch** (16. septämber)

- **Naie frisch-kurse** önj Risem Schölj (11./12. septämber)

- **29. Friisk Harfsthuuchsölj** önj Jarplund (19. – 22. oktoober)

Dü fanst e Friisk Foriining nü uk aw **Facebook**. Heer fant huum åles wat jüst önj e feriin for ham gungt. Arken törsdi jeeft et deer uk dât "Frasch uurd foon e waag".

Impräsum: Friisk Foriining, Friisk Hüs,
Süderstr. 6,
25821 Bredstedt/Bräist
ViSdP: Ilwe Boysen